

Gabinete di Aruba cu un bunita homenahe na Hubert (Lio) Booi



Den Haag – Durante un encuentro den Sala Padu na Gabinete di Minister Plenipotenciario a tuma lugar un homenahe na e gran baluarte di cultura di Aruba Hubert (Lio) Booi d.f.m.

Den presencia di Minister Plenipotenciario Alfonso Boekhoudt, Minister Plenipotenciario suplente di Curaçao Robert Candelaria, directora di Gabinete di Aruba Shandra John, Lidwina Booi, yui muher di Hubert Booi y un sala yen di invitadonan, Mirto Lacle a tene un presentacion eloquente 'Recordando Hubert (Lio) Booi'.

E presentacion cu hopi potret for di e album priva di famia Booi a duna un bunita

impresion di su bida y su amor pa e cultura Arubano. Despues di e presentacion di Mirto Lacle a pasa e film 'Nos ta canta'. E documentario aki ta rindi homenahe na cuater icono musical Arubano. Atraves di entrevistanan cu cuater persona conoci den e mundo di musica di Aruba cu ta Maybeline Arends-Croes, Digna Lacle-Herrera, Carmen Herrera y Tica Giel, ta muestra e importancia di e cancionnan tipico di Aruba y e rol cu nan ta hunga den nos herencia cultural.

Finalmente Mirto Lacle a haci entrega di un buki di 'Nos ta canta' na Minister Plenipotenciario Alfonso Boekhoudt y directora di Gabinete di Aruba Shandra John.



Dos escritor Arubiano cu ta Olga Orman y Quito Nicolaas tambe a haci entrega di nan ultimo publicacion na sr. Boekhoudt y sra. John. Olga su buki di poesia Cas di Biento ta contene poesianan na tanto Papiamentu como Hulandes. El'a scirbi nan pa gran parti na Hulanda y tambe na Aruba y Curaçao.

E poesianan di Olga ta ilustra un gran envolvimento y su relacion cu loke ta pasa na su isla natal.

Quito Nicolaas su buki 'Cucuisa Cabisha' ta un seleccion door di Fred de Haas di 42 poesia for di e cinco buki di poesia cu Quito Nicolaas a yega di scirbi.

E contenido di e poesianan ta muestra hopi cla cu e escritor ta sigui e sucedidonan na Aruba hopi di cerca. Sigur un bunita anochi literario y cultural unda a brinda homeneha y a recorda na un gran baluarte di cultura di Aruba.